

14.08.2025

UKA2025/72

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata nr. 21, 28. november 2016-imeersup atorunnaarsinneqarnissaa pillugu siunnersuummik, kingusinnerpaamik UKA2026-mi, saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Pele Broberg, Naleraq)

Tunngavilersuut:

Soraarnerussutisiaqarnissamut aaqqissuussinermut pinngitsoorani ilaanissaq pillugu inatsisip siunertarineqartumik uniuksimanera ukiuni kingullerni ersarissimavoq. Inuit pinngitsaallugit kiffaanngissuseqartilersinnaanngillat. Tamanna imminut akkerliinneruvoq. Inuit ikiorniarnarlugit pinngitsaaliissummik artukkerunnaarniarlik. Pinngitsaaliinermut inatsiseqarnerput unitsitsigu, pinngitsaaliilluni katersisussaataaneq atorunnaarsitsigu.

Aalajangiiffissatut siunnersuut akuerineqarpat, pinngitsoorani soraarnerussutisiaqarnissamut katersisussaataanerup atorunnaarsinnissaannik Naalakkersuisut inatsisissatut siunnersuummik saqqummiusseqquneqassapput, taamaasinikkut pinngitsaaliisariaarulluni, namminerli piumassuseq aallaavigalugu katersisinnaanissamik taamaallaat aaqqissuussaqaarnissap aallaavigneqalersinnaanissaa anguniarlugu.

Aaqqissussaq maanna atuuttoq inuiaqatitsinnut tulluannilaq. Immitsinnut aallaaviginata pinngitsaalisamik artukkiivugut. Inuit ajunngitsuliortut ajunngitsuliornertik aningaasarsiutiginnikkunikku utoqqalinerminni toqqaannanngitsumik pillagaassutigissavaat.

Assersuutigalugu piniartup piniakkaminik killilersugaangaatsiartumik pisaqarsimalluni, sumiiffimmini tamanut sassaalliutiguniuk utoqqalinerani ajornerusumik atugassaqaartinneqalissaaq.

Inuiattut ileqqutoqqagut kinaassuserpullugu aallaavigalugit ajunngitsuliormat, utoqqalinerani ajornerusumik atugassaqaartitsilluta inatsisitigut inississavarput, inuiaqatini pillerfigisani aningaasarsiutiginnaginnamigit. Aningaasarsiutiginnaginnamigit taamaasilluni

utoqqalinersiutissai ajornerutinnissaanut inatsisitigut utoqqatsissutigissavarput. Ajunngitsuliornikkut toqqaannangitsumik pillaa neq. Ajorpoq.

Siunissaq ungasissoq eqqarsaatigalugu, aammali innuttaasut ulluinnarni atugaannik eqqarsaatiginnittumik eqqarsarnissaq Naleqqamut aalajangiisuuvoq. Akit atorsaangivissortut maanna atuupput, soorlu ilaatigut orsussamut, innaallagissamut, inissianut, allanullu pisorta qarfinniit akinik qaffaarujussuarnerit, taamatuttaaq tamani pisiassanut akit qaffangaatsiarneri eqqarsaatigalugit.

Taamaattumik soraarnerussutisiaqarnissamut aaqquissuussinnermut pinngitsoorani ilaanissap nammineq kajumissuseq tunngavigalugu ilaaffigineqartussanngortinneqarnissaanik Naalakkersuisut Inatsisartunit peqquneqarnissaanik maanna tigussaasumik siunnersuuteqarpugut, taamaaliortoqarneratigut inatsit pisariaarutsinneqassammat, imaluunniit atorunnaarsilluinnarneqassammat.

Qujanartumik takusinnaavarput sulisartorpassuaqartoq soraarnerussutisiaqalernissamut ileqqaagaqarnissamut ersarissumik ilinniartinneqarsimasunik, taamaattumik inatsit asuliinnavissimanngilaq. Kisianni ajorluartumik aamma takusinnaavarput inatsit isumaginninnikkut eqquinerluttoq, tamatumanilu pingaartumik ilaqutariaat kisimiittullu naammattusaariniarnerminnik ajornartorsiuteqartut.

Tamatuma peqatigisaanik inatsimmut oqaaseqaatini ersarissorujussuarmik aamma takuneqarsinnaavoq, inatsit pisortani sipaarniuteqartoqarnissaanik siunertaqanngitsoq, taamaallaalli inuuniarnikkut atugassarititaasut pitsaassusaannik qaffassaanissamik siunertaqartoq, taamaaliornikkullu utoqqalinersiat imaaliiallaannaq allanngortinneqarsinnaanngitsut.

Taamaammat neriuuteqarluartumik siunnersuut saqqummiunneqarpoq, maluginiagassaammammi siunnersuutip massuma assigalugu ilutigisaa siornatigut qaqinneqarnikuummat (UKA2022/141), tassanilu ilaatigut Demokraatit sinnerlugit tapersiisimasoqarmat, siunnersuummut oqaaseqaatiminni ilaatigut imatut taperserlugu oqaasertalerneqartoq: *“pinngitsaaliissummik utoqqalinersianik ileqqaarnissamik inatsisip atorunnaarsinnissaa ilalerparput”*¹

Taamatuttaaq Atassut sinnerlugu siunnersuummut taperserneqarluni ilaatigut imatut oqaasertalerneqarpoq: *“Atassummiit siunnersuut ilusaatut isikkoqartiinnarlugu akueralugu oqaatigerusupparput.”*²

¹ Demokraatit sinnerlugu EM2022/141-imut oqaaseqaat, ulloq 4. oktober 2022

² Atassut sinnerlugu EM2022/141-imut oqaaseqaat, ulloq 4. oktober 2022

Taamaasilluni Naleraq sinnerlugu maanna qinersivimmi amerlanerussuteqartumik isummersinnaaneq neriuteqarfigalugu siunnersuut Inatsisartunut suliasanngorlugu tunniunneqarpoq.

Pisortanut aningaasatigut allaffissornikkullu kingunerisassat

Aalajangiiffissatut siunnersuuterpiaap akuerineqarnera, pisortanut aningaasatigut allaffissornikkullu kingunerisassai AC-fulmægtigtip ukiumut akissarsiassaata affaata iluani, tassa 250.000 kr. nalinganut ingerlanneqarsinnaanissaa naatsorsuutigineqarsinnaasaaq.

Namminersorluni inuussutissarsiuteqarnermut aningaasatigut allaffissornikkullu kingunerisassat

Aalajangiiffissatut siunnersuuterpiaap akuerineqarnera toqqaannartumik namminersorluni inuussutissarsiuteqarnermut aningaasatigut allaffissornikkullu kingunerisassanik soqanngilaq.

Innuttaasunut aningaasatigut allaffissornikkullu kingunerisassat

Aalajangiiffissatut siunnersuuterpiaap akuerineqarnera toqqaannartumik innuttaasunut inuussutissarsiuteqarnermut aningaasatigut allaffissornikkullu kingunerisassanik soqanngilaq.